

Evening Dogri News Bulletin, 06th July 2024

इवनिंग डोगरी न्यूज़ बुलेटिन

समे .1815

Headlines

- 1 संसद दा बजट इजलास औं दी 22 जुलाई शा 12 अगस्त तगर होग। केन्द्री बजट 23 जुलाई गी पेश कीता जाग।
- 2 जम्मू कश्मीर पुलस दे महानिदेशक आर.आर.स्वैन होरें डोडा जिले दा दौरा लाइयै कनून बवस्था दी स्थिति दा जायजा लैता।
- 3 भारी बरखें दे चलदे कश्मीर घाटी थमां श्री अमरनाथ जी दी यात्रा अज्ज मुअत्तल रेई।
- 4 क्रिकेट च भारत ते जिम्बावे बश्कार 5 मैचें दी श्रृंखला दा पैहला टी-20 अंतर्राष्ट्रीय मैच अज्ज हरारे च चलै करदा ऐ।

<><><><><><>

Parliament Budget

संसद दा बजट इजलास इस म्हीने दी 22 तरीक थमां शुरू होग। संसदीय कार्यमंत्री किरिन रिजिजू होरें इक सोशल मीडिया पोस्ट च आखेआ जे बजट सत्र 12 अगस्त तगर चलोग। उनें आखेआ जे केन्द्री बजट 2024-25 लोकसभा च 23 जुलाई गी पेश कीता जाग। श्री रिजिजू होरें आखेआ जे राष्ट्रपति द्रौपदी मुर्मू होरें बजट इजलास ताई दौनें सदनें दा सत्र सद्दने दे प्रस्ताह दी केन्द्र सरकारै दी सिफारश गी मंजूरी देई दित्ती ऐ।

<><><><><><>

Vice President

उपराष्ट्रपति जगदीप धनखड़ होरें आखेआ ऐ जे देसै दा भविक्ख नोजवानें कन्ने तैह होंदा ऐ ते नोजवानें दा जोश ते वचनबद्धता देसै गी इक विकसित राष्ट्र दी सोच बक्खी लेई जाग। उनें गलाया जे देसै च युवाएं दे तरक्की बाद्धे आस्तै बेहतर माहौल ऐ ते ओह अपनी मर्जी ते हुनर गी विकसित करी सकदे न। उपराष्ट्रपति अज्ज केरल दे तिरुवंतपुरम च भारतीय अंतरिक्ष विज्ञान ते टैक्नालोजी संस्थान दे 12में स्नातक समारोह गी संबोधत करा'रदे हे।

<><><><><><>

PM-HM Syama Prasad

प्रधानमंत्री नरेन्द्र मोदी ते गृहमंत्री अमित शाह होरें भारतीय जनसंघ दे संस्थापक डॉ. श्यामा प्रसाद मुखर्जी हुंदी जयंति दे मौके पर श्रद्धांजलि भेंट कीती ऐ। इक सोशल मीडिया पोस्ट च प्रधानमंत्री होरें आखेआ जे डॉ. श्यामा प्रसाद मुखर्जी होरें निग्गर राष्ट्रवाद दे बचारें आले भारत दा मान बधाया ऐ। उनें आखेआ जे मातृभूमि लेई उंदा समर्थन भाव ते त्याग देश वासिएं गी सदा-सदा लेई प्रेरत करदा रौहग। तोआई गृहमंत्री अमित शाह होरें इस मौके पर डॉ. श्यामा प्रसाद मुखर्जी होरें गी श्रद्धांजलि भेंट करदे होई आखेआ जे उनें जनसंघ दी स्थापना दे कन्नै देश गी सोचने दा विकल्प प्रदान कीता। ओह लम्मे समें तगर "राष्ट्र प्रेम" यानि राष्ट्र हित गी सब्बने शा उप्पर रखने आली सोच दी बत्तै पर टुरने लेई सब्बने दे मार्गदर्शक बने दे रौहगन।

<><><><><><>

DGP Doda

डोडा जिले च हाल च गै होई दिएं आतंकवाद सरबंधी घटनाएं मगरा जम्मू कश्मीर पुलस दे महानिदेशक आर.आर.स्वैन होरें मैहकमे दे होर दुए आला अफसरें कन्नै अज्ज डोडा दा दौरा लाया ते इस पहाड़ी जिले च कनून बवस्था ते सुरक्षा स्थिति दा मौके पर जायजा लैता। एडीजीपी कनून बवस्था विजय कुमार ते एडीजीपी जम्मू जोन आनंद जैन हुंदे कन्नै श्री स्वैन होर हाल च गै गंदोह च भखे दे टाकरे च शामिल पुलस अधिकारिएं, फौजिएं ते उंदे परोआर आलें कन्ने मलाटी लाई। ध्यानजोग ऐ जे इस टाकरे च 3 आतंकवादी मारे गे हे। उनें आतंकवाद खलाफ लड़ाई च एसपीओ

दी भूमका दी सराहना बी कीती। डीजीपी होरें यूटी च माहौल खराब करने लेई आतंकवादिएं गी इत्त बक्खी भेजने तांई पाकिस्तान गी दोषी ठैहराया

इस मौके पर डीजीपी होरें 7 एसपीओएं गी पुलस कांस्टेबल दे तौरा पर नियुक्त करने दे आदेश बी जारी कीते।

<><><><><><>

Kulgam Encounter

दक्खन कश्मीर दे कुलगाम जिले च अज्ज आतंकवादिएं ते सुरक्षा बलें बश्कार भखे दे टाकरे च इक जवान जख्मी होइ गेआ। टाकरा कुलगाम दे मोदरगाम ग्रां च उसलै शुरू होआ जिसलै सुरक्षा बलें दी इक सांझी टीमै आतंकवादिएं दी मजूदगी बारे इक टकोहदी सूह थोने परेंत इलाके दी घेराबंदी करियै तपाशी अभियान शुरू कीता। अपने पर घेरा कसौंदा दिक्खियै आतंकिएं सुरक्षाबलें पर गोलीबारी कीती जेहदा परता दिंदे गै टाकरा भखी गेआ। जम्मू कश्मीर पुलस नै इक सोशल मीडिया पोस्ट च आखेआ ऐ जे सुरक्षा बल मुस्तैदी कन्ने जुटे दे न ते अगड़ी जानकारी मगरा दितती जाग। थोई दी ताजा जानकारी मताबक टाकरे च जख्मी होए दे सेना दे जवान नै जख्में दा ताह नेई जरदे होई दम त्रोड़ी दित्ता ऐ। समाचार अजेंसी पीटीआई नै पुलस अधिकारिएं दे हवाले कन्ने दस्सेआ जे इलाके च 2 शा 3 आतंकवादिएं दे छप्पे दे होने दी शैंका ऐ। टाकरा अजें जारी ऐ ते होर ब्यौरे गी बलगेआ जा'रदा ऐ।

<><><><><><>

Hav Abdul Majid

शहीद हवलदार अब्दुल माजिद सेना पैरा कमांडो गी कल राष्ट्रपति द्रौपदी मुर्मू हुंदे आस्सेआ मरणोपरांत कीर्ति चक्कर कन्ने सम्मानत कीता गेआ, जिस करियै समूलचे ग्रां कन्ने परेआर मान मसूस करा'रदा ऐ की जे शहीद हवलदार माजिद दी शहादत गी पूरे देसै नै मानता दित्ती ऐ। सरहदी जिले पुंछ दे ग्रां अजोत दे बसनीक अब्दुल माजिद नै जंदे ब'रे नवम्बर च राजौरी च कालाकोट दे जंगलें च टाकरे दरान दऊं आतंकवादिएं गी मारी मकाइयै अपने कमांडरें दी जिंदु दी हिफाजत कीती ही। जित्थें इक बक्खी अब्दुल माजिद दी मौरी गी अपने पुत्रै दी शहादत पर मान ऐ उत्थें गै ओहदा पुत्र बी अपने पिता आला लेखा फौज च भर्थी होइयै देसा दी सेवा करना चांहदा ऐ.....

<><><><><><><>

Health Ministry NEET

सेहत मंत्रालय नै साफ कीता ऐ जे नीट अंडर ग्रेजुएट दी काउंसलिंग अगड़ा पाए जाने दी खबर सच नेई ऐ की जे इस सरबंधै च अजें तरीक दी अधिसूचना जारी नेई कीती गई ऐ। नीट-यूजी काउंसलिंग स्थगित कीते जाने दे सरबंधे च मीडिया दिएं खबरें बश्कार सेहत मंत्रालय नै एह स्पष्टीकरण दित्ता ऐ।

<><><><><><><>

Iran Elections

ईरान च सुधारवादी लीडर ते साबका सेहत मंत्री मसूद पेजस्कियान होरें गी राष्ट्रपति चुनां च जित्त हासल होई ऐ। उनें कट्टरपंथी नेता सर्ईद जलीली गी हराया। दुए गेड़ दे मतदान च पेजस्कियान गी 3 करोड़ वोटें चा 1 करोड़ 63 लक्ख वोट थ्होए। ईरान दे 14में राष्ट्रपति दे चुनां लेई दुए गेड़ दा मतदान कल होआ हा, जेहदे च 50 फीसद शा बद्ध वोटरें हिस्सा लैता। पैहूले दौर च ईरान च 1979 दे इस्लामिक क्रांति मगरा रिकार्ड सब्बने शा बद्ध मतदान होआ हा। चुनां प्रचार दरान पेजस्कियान होरें समूलची दुनिया लेई ईरान दे भित्त खोलने ते बंदशा हटाने दे कन्नै अर्थबवस्था च सुधार लेई पच्छम देसें कन्नै परमाणु समझौता करने दा बाद्धा कीता हा, जिसलै के जलीली होरें कट्टरपंथी बचारधारा गी अगगै लेई जाने ते रूस ते चीन कन्नै ईरान दे सरबंधें गी मजबूत करने दी गल्ल कीती ही।

तोआई प्रधानमंत्री नरेन्द्र मोदी होरें ईरान दे नमें चुनोए दे राष्ट्रपति मसूद पेजस्कियान होरें गी शुभकामना दित्तियां न। श्री मोदी होरें इक सोशल मीडिया पोस्ट च आखेआ जे भारत-ईरान ते इलाके दे लोकें दी भलाई बेहतरी आस्तै दपक्खी सरबंधे गी होर बी मजबूत बनाने आस्तै ओ श्री पेजस्कियान हुंदे कन्ने कम्म करने लेई अगड़ा दिक्खा'रदे न।

<><><><><><><>

Amarnath Yatra

रातभर बरी दी बड़ी मती बरखा करियै श्री अमरनाथें जी दी सलाना यात्रा एहतियात दे तौरा पर रोकी दितती गई ऐ। पहलगाम ते बालटाल दौनें रस्तेआं यात्रा आरजी तौरा पर बंद ऐ। उआं खीरी

रिपोर्ट औने तगर हैलीकाप्टर सेवा जारी ही। 4000 शा बद्ध यात्री रिवायती पहलगाम रस्ते पर नुनवान अधार शिविर च डटे दे न। जेकर कल बडलै मोसम च सुधार होग ते यात्रुएं गी श्री अमरनाथें जी दी दे दर्शनं आस्तै पवित्र गुफा बक्खी अगड़ी यात्रा दी खुल्ल दित्ती जाग।

<><><><><><>

Udhampur Injured

उधमपुर जिले दी कोटली वाला पंचैत च अनसू ग्रां दे वार्ड नंबर 5 च बड़ी मती बरखा करियै अज्ज इक कच्चे मकान दे ढेई जाने कारण इक परोआर दे 3 लोक घायल होई गे। उधमपुर दियां डिप्टी कमीशनर सलोनी राय होरें आखेआ जे जख्मिएं गी जिला अस्पताल च भर्ती करोआई दितता गेआ ऐ ते उंदी हालत खतरे थमां बाहर ऐ। उनें गलाया जे मैहकमा माल दी इक टीम गी नुकसान दा जायजा लैने आस्तै मौके पर भेजेआ गेआ ऐ तां जे पीड़ित परोआर गी राहत पजाई जाई सकै।

<><><><><><>

Reasi Vehicles

रियासी दे एआरटीओ होरें घट्टोघट्ट 72 गड्डिएं गी ब्लैक लिस्ट करने दे कन्नो कन्नी 25 ड्राइविंग लसैंसे गी मुअत्तल कीती ऐ। रियासी थमां आकाशवाणी संवाददाता देवेन्द्र ठाकुर होरें दस्सेआ जे रियासी च इक टकोहदा अभियान चलाइयै बकाया पेदे चलान ते तैह समें गी पार करी चुके दे दस्तावेजें आलिणं गड्डिएं गी ब्लैक लिस्ट कीता गेआ ऐ।

<><><><><><>

Samba Power Lifting

जंगलात मैहकमे च बतौर डिप्टी इंस्पैक्टर कम्म करा करदे सांबा जिले दी तैहसील बड़ी ब्राहमणा दे ग्रां पट्टी दे बसनीक अजय शर्मा नै इंग्लैंड च मास्टर वर्ग च डैड लिफ्ट ते फुल मीट च दऊं सुन्ने दे तगमें जित्ते न। सांबा थमां आकाशवाणी संवाददाता नै दस्सेआ जे भारत थमां 11 खडारिणं हिस्सा लैता ते चार खडारिणं अपने-अपने वर्ग च पदक हासल कीते।

<><><><><><>

Cricket

भारत ते जिम्बावे बशकार 5 टी-20 क्रिकेट मैचें दी श्रृंखला दा पैहला मैच अज्ज हरारे च खेड्डेआ जा करदा ऐ। रोहित शर्मा, विराट कोहली ते रविन्द्र जडेजा दे टी-20 मैचें थमां सन्यास लैने परैत भारत दा एह पैहला टी-20 मैच ऐ। पिछले म्हीने वैस्टइंडीज़ च विश्व कप जित्तने मगरा भारतीय टीम दे वरिष्ठ खडारिएं गी अराम दित्ता गेदा ऐ। तोआई टॉस जित्तने परैत भारत नै पैहले गेंदबाजी करने दा फ़ैसला लैता। जिम्बावे नै पैहले बल्लेबाजी करदे होई तैह 20एं ओवरें च 9 विकटें दे नुक्सान पर 115 रंज बनाए न ते भारत गी जित्त लेई 116 रंजें दा लक्ष्य दित्ता ऐ।

<><><><><><>

Weather

जम्मू खित्ते दिएं मती सारी थाहरें पर जंदी रातीं होई दी बरखा करी तापमान च खरी मती गिरावट दर्ज कीती गई ऐ। मौसम विभाग दी जानकारी मूजब जम्मू च अज्ज दिनै दा बद्धोबद्ध तापमान 30.9 डिग्री सैल्सियस दर्ज कीता गेआ जदके जंदी रातीं दा घट्टोघट्ट तापमान 21.6 डिग्री सैल्सियस रिकार्ड कीता गेआ ऐ। जम्मू च पिछले 24एं घँटे दरान 69.4 मिलिमीटर बरखा दर्ज कीती गई ऐ।

<><><><><><>